

AKHBAR : BERITA HARIAN

MUKA SURAT : 3

RUANGAN : NASIONAL

Penularan COVID-19

100 kes baharu peningkatan mendadak

85 penularan tempatan, 15 jangkitan import

Oleh Rafidah Mat Ruzki dan Noor Atiqah Sulaiman
bhnews@bh.com.my

Putrajaya: Kes baharu COVID-19 mencatatkan peningkatan mendadak iaitu 100 kes dilaporkan semalam, membabitkan 85 kes penularan tempatan dan 15 kes import.

Ketua Pengarah Kesihatan, Tan Sri Dr Noor Hisham Abdullah, berkata bagi penularan tempatan, 62 kes dikesan daripada Kluster Lahad Datu (LD), manakala 23 kes lagi dikesan dalam Kluster Sungai.

Katanya, dengan pertambahan kes itu ia menjadikan jumlah kumulatif kes di negara ini sebanyak 9,559 kes dengan jumlah kes aktif iaitu 295 kes.

"Kluster LD mencatatkan 62 kes baharu iaitu 37 kes membabitkan Orang Kena Tahan (OKT) di Ibu

Pejabat Daerah Lahad Datu manakala 25 kes lagi membabitkan OKT di Penjara Tawau.

"Bagi 23 kes dalam Kluster Sungai pula, 22 kes membabitkan individu di Kedah dan seorang di Perlis. Memperincikan mengenai kes baharu dalam kluster ini, seramai 16 petugas kesihatan termasuk seorang daripadanya (petugas kesihatan) menjangkiti tujuh ahli keluarga yang lain.

"Secara keseluruhannya, penularan tempatan membabitkan 55 rakyat Malaysia dan 30 warga asing," katanya pada sidang media COVID-19, di sini, semalam.

Bagi kes import mendapat jangkitan dari luar negara, Dr Noor Hisham berkata, ia membabitkan dua rakyat Malaysia dan 13 warga asing.

"Terdapat 11 kes mendapat jangkitan dari India, dua kes dari Indonesia dan masing-masing satu kes dari Pakistan dan Filipina. Sehingga kini seramai tujuh individu sedang dirawat di Unit Rawatan Rapi (ICU) dan empat daripadanya memerlukan bantuan pernafasan," katanya.

Bagi kes sembuh, Dr Noor Hisham memaklumkan 12 kes di-



Kerajaan memutuskan untuk memperketatkan kemasukan Pemegang Pas Lawatan Jangka Panjang dari 23 negara untuk memasuki negara ini.

Dr Noor Hisham Abdullah,
Ketua Pengarah Kesihatan

laporkan sehingga jam 12 tengah hari semalam, menjadikan jumlah kes sembuh di negara ini sebanyak 9,136 kes, bersamaan 95.6 peratus daripada jumlah keseluruhan kes.

Beliau berkata, tiada pertambahan kes kematian semalam dan jumlahnya kekal 128 kes iaitu 1.34 peratus daripada jumlah keseluruhan kes.

Sementara itu, Dr Noor Hisham berkata, kerajaan memutuskan untuk memperketatkan kemasukan Pemegang Pas Lawatan Jangka Panjang dari 23 negara untuk memasuki negara ini su-

lulan peningkatan kes secara mendadak.

Beliau berkata, semua negara yang disekat itu mencatatkan kumulatif kes positif COVID-19 melebihi 150,000 kes.

Katanya, ini antara langkah bagi memperketatkan dan meningkatkan kawalan sempadan serta pihaknya akan meneruskan penilaian risiko berdasarkan situasi semasa COVID-19 di seluruh dunia.

"Senarai terkini negara yang diperketatkan kemasukan akan diumumkan kerajaan dari semasa ke semasa," katanya.

'Masyarakat mungkin sudah alpa tak endah SOP'

Putrajaya: Nilai kadar kebolehan jangkitan atau R naught (RO) meningkat 1.72 ketika ini berbanding 0.72 pada dua minggu lalu.

Ketua Pengarah Kesihatan, Tan Sri Dr Noor Hisham Abdullah, berkata peningkatan secara ketara ini memberi gambaran risiko berlaku lebih banyak transmisi dalam komuniti.

Beliau berkata, masyarakat kini mungkin sudah alpa dan tidak mengendahkan Prosedur Operasi Standard (SOP) yang ditetapkan, menyebabkan nasihat diberikan pihaknya mula diambil ringan termasuk oleh petugas barisan hadapan dan agensi lain.

"Petugas barisan hadapan sememangnya mempunyai risiko tinggi dijangkiti penyakit COVID-19 atau lain-lain penyakit berjangkit ketika di fasiliti kesihatan.

"Misalnya, hari ini (semalam) seorang anggota kesihatan daripada Kluster Sungai didapati sudah menjangkiti tujuh orang ahli keluarganya. Mengambil iktibar daripada kejadian ini, Kementerian menggesa semua petugas kesihatan, petugas barisan hadapan pelbagai agensi dan semua lapisan masyarakat mengambil serius situasi COVID-19 dalam negara.

"Susulan itu, pematuan 100 peratus terhadap garis panduan dan tatacara pengurusan ketika bertugas dan ketika tidak bertugas amat penting," katanya dalam sidang media COVID-19, di sini, semalam.

'Elak laga tangan kurangkan risiko jangkitan'

Kuala Lumpur: Trend orang ramai ketika ini melakukan 'fist bump' atau menggendang dan melagakan tangan apabila berjumpa perlu dielak untuk mengurangkan risiko penularan wabak COVID-19, kata Timbalan Menteri Kesihatan I, Datuk Dr Noor Azmi Ghazali.

Beliau berkata, orang ramai dinasihat berhati-hati kerana perbuatan itu membabitkan sentuhan fizikal yang tidak digalakkan Kementerian Kesihatan (KKM). "Jangan bersalaman dan bersentuhan termasuk lagakan anggota badan, namun kini saya lihat trend bukan sahaja melakukan begini (fist bump), tetapi genyeh lagi, adakah kita mencuci tangan selepas itu.

"KKM hanya anjur hormat dengan meletak tangan di dada dan tunduk hormat, jadi saya lihat trend sedang berlaku kini tidak

baik dan saya sarankan supaya berhati-hati," katanya pada sesi soal jawab persidangan Dewan Negara, semalam.

Dr Noor Azmi menjawab soalan tambahan Senator Lim Pay Hen yang bertanyakan perancangan kerajaan menghadapi wabak COVID-19 yang dijangka oleh saintis akan berlanjutan dua tahun lagi, termasuk dari segi perjawatan pegawai perubahan.

Mengulas perkara itu, beliau berkata, Malaysia terbukti sebagai antara negara yang berjaya mengawal dan mengurus wabak itu dengan baik sehingga diiktiraf dunia, malah kerajaan akan melipatgandakan usaha itu.

"Kita akan terus memantau perkembangan wabak ini dari semasa ke semasa kerana kita masih belum mengenalinya, senjata yang kita ada ada ketika ini hanya pelitup muka dan sanitasi tangan,

selain penjarakan fizikal," katanya.

Sementara itu, Dr Noor Azmi berkata, saringan pengesanan COVID-19 setakat ini hanya dilakukan, terhadap individu bergejala dan berisiko tinggi, serta buat masa ini tiada cadangan memberikan perkhidmatan itu secara berkala dan percuma kepada guru sekolah.

"Kerajaan sudah membangunkan prosedur operasi standard (SOP) dalam pelbagai subsektor termasuk sektor pendidikan, justeru pematuan pada SOP ini penting bagi memastikan tiada penularan jangkitan COVID-19 di sekolah," katanya menjawab soalan Senator Robert Lau Hui Yew yang bertanyakan, sama ada kerajaan bersedia memberikan perkhidmatan ujian percuma dan berkala kepada guru sekolah.

BERNAMA



Perbuatan menggendang dan melagakan tangan apabila bertemu seseorang perlu dielak untuk mengurangkan risiko penularan pandemik. (Foto Hasriyasyah Sabudin/BH)